

GAYA KEMAS CHIC

BIEM penuh aspirasi gaya hidup muda mudi

Oleh Fairuz Zaidan
fairuzaidan@bharian.com.my

SESUAI gaya hidup kota, fesyen seolah-olah bergerak seiring survival diri. Menyoroti cita rasa bergaya, idea bebas serta kesinambungan fesyen meletakkan penampilan dalam paksi yang memenuhi acuan sukses.

Penggunaan yang sempurna bermakna paduan pakaian harus

menepati tema serta kesesuaian acara. Memastikan keserasian dalam etika penggunaan, jenama profesional BIEM mengetengahkan identiti rekaan yang memenuhi keperluan trampil kemas penuh aspirasi.

Ringkas tetapi menepati ciri sempurna untuk gaya penuh kekemasan, BIEM merangka identiti meliputi rekaan moden kontemporari, segar dan ciri praktikal sebagaimana idea terkini untuk



insan yang mementingkan kesempurnaan.

Gaya urban yang dirintis menerusi rekaan ke acara rasmi dan pejabat - tidak terhad dari segi potongan yang mencerminkan identiti kontemporari, sentuhan BIEM turut mengambil kira aspek warna dan perincian sekali gus menepati tema dan keyakinan sebenar.

Menyentuh mengenai identiti rekaan, gaya bagi rekaan BIEM lelaki menepati ciri golongan profesional muda berdasarkan jenis potongan yang segar, terkini dan sensasi. Laksana rekaan berkelas dunia, potongan bagi setiap persalinan lelaki BIEM meletakkan satu aras tinggi pada penampilan jejaka.

Reka bentuk lebih maskulin, bercita-cita dan kombinasi warna yang universal, BIEM banyak berfantasi dengan material, sentuhan kemeja yang menepati keinginan sebenar jejaka, idea blazer berpotongan halus, seluar panjang tirus. Kombinasi rona putih, hitam dan kelabu dilihat sesuatu yang semula jadi mewakili selera lelaki.

Mengimbangi rona sejati lelaki, BIEM juga nampak mencuba kelainan dengan mengetengahkan rona pastel biru, hijau dan merah jambu untuk rekaan kemeja di mana idea paduan baju dan seluar mampu mencetuskan kombinasi sempurna.

Tidak terhad pada rekaan

rasmi ke pejabat, BIEM Homme direka bagi memenuhi keperluan jejaka bagi pakaian kasual. Material segar khususnya pada persalinan baju kain kapas, blazer dan jaket memastikan penawaran pakaian kasual.

Manakala sentuhan rekaan wanita BIEM pula menyaksikan persalinan profesional disuntik dalam adunan gaya yang memberi sifat progresif dalam penggunaan. Susuk gaya wanita muda yang bekerja profesional diserlahkan dengan identiti material rekaan khususnya penumpuan pada baju, blazer, skirt dan seluar yang menambahkan pesona gaya pemakaian.

Seolah mahu berfantasi dengan gaya terkini sambil lari dari pada ciri konvensional, ketara rekaan segar dalam penampilan wanita BIEM menerusi perincian, material fabrik serta potongan yang tidak terlalu spesifik pada rekaan pejabat.

Kombinasi gaya rasmi ke pejabat yang disesuaikan dengan persekitaran dan ciri praktikal, terserlah kelainan dalam persalinan untuk wanita. Andai disoroti persalinan gaya, penampilan wanita tidak terhad untuk gaya rasmi semata-mata, ini kerana idea dan rekaan menyeluruh memberi warna dan keselesaan untuk bergaya ke pelbagai acara sampingan. Ditambahkan pula dengan padanan aksesori, tiada sebab dan alasan untuk lelaki dan wanita tidak bergaya!